

आकाशवाणी

खबरां श्रुति खजूरिया कोला

- राज्यसभा च पहलगाम आतंकवादी हमले दे परते च देशे दे सशक्त, सफल ते निर्णायक ऑपरेशन सिंदूर पर अज्ज परतिए शुरु होई। विदेश मंत्री डॉ. एस जयशंकर होरें इस भियान दौरान सशस्त्र बलें दी भूमिका दी सराहना कीती।
- लोकसभा च मणिपुर च राष्ट्रपति शासन दी अवधि छह महीने आस्तै बढ़ाने संबंधी वैधानिक प्रस्ता व पर चर्चा शुरु होई।
- रेल मंत्री अश्विनी वैष्णव होरें आक्खेआ ऐ जे छडे त्रै बरें च गै वंदे भारत रेल सेवा सारे राज्यें च उपलब्ध ऐ।
- भारती अंतरिक्ष अनुसंधान संगठन-इसरो नै अज्ज सिंथेटिक अपरचर रडार उपग्रैह निसार दा सफल परक्षेपण कीता।
- राष्ट्रपति द्रौपदी मुर्मु होर अज्ज पश्चिम बंगाल दे नादिया जिले च स्थित अखिल भारतीय आयुर्विज्ञान संस्थान -एम्स, कल्याणी दे दीक्षांत समारोह च शामिल होईयां।
- श्री अमरनाथ जी दी जातरा गी अज्ज बड्डलै भारी बरखा दे मददेनजर पहलगाम ते बालटाल आहले दौनें रस्तेया रोकी दिता गेआ ऐ। श्री अमरनाथ जी दी जातरा दरान अजे तोहड़ी बाबा बर्फानी दे दरबार च मत्था टेकने आहलें दी गिनतरी 3 लकख 93 जहार दे आंकड़े गी पार करी गई ऐ।

R.S-Op Sindoor

राज्यसभा च पहलगाम आतंकवादी हमले दे परते च देशै दे सशक्त, सफल ते निर्णायक ऑपरेशन सिंदूर पर अज्ज परतिए शुरु होई। चर्चा च हिस्सा लैन्दे होई विदेश मंत्री डॉ. एस जयशंकर होरें ऑपरेशन सिंदूर गी रोकने आस्तै मध्यस्थता दे दावें दा खंडन करदे होई आक्खेआ जे 22 अप्रैल सोयां 16 जून तक प्रधानमंत्री नरेंद्र मोदी ते अमरीका दे राष्ट्रपति डोनाल्ड ट्रंप हुन्दे बशकार फोन पर कुसै चाल्ली दी गल्लबात नेई होई। उने आक्खेआ जे कुसै बी दुनिया दे नेता नै भारत सोयां एह ऑपरेशन रोकने आस्तै नेई आक्खेआ। विदेश मंत्री होरें आक्खेआ जे अमरीका दे उपराष्ट्रपति हुन्दे कन्ने गल्लबात दौरान भारत नै अपना एह रुख साफ करी दिता हा जे जेकर पाकिस्तान हमला करदा ऐ तां फीह भारत बड्ड़ा हमला करिऐ जवाब देग। ऑपरेशन सिंदूर दी सफलता पर लौह पान्दे होई उने आक्खेआ जे पाकिस्तान च बहावलपुर ते मुरीदके जनेह सब्बनै थवा बड्डे आतंकवादी केंद्रें गी भारी नुकसान होआ ऐ। श्री जयशंकर होरें आक्खेआ जे पाकिस्तानी हवाई अड्डें दा विनाश ते पाकिस्तान च आतंकवादियें दे अंतिम संस्कार दे वीडियो ऑपरेशन सिंदूर दी सफलता गी दर्शान्दे न। उने आक्खेआ जे पहलगाम आतंकी हमले दे पीछे दी मंशा जम्मू-कश्मीर दी अर्थव्यवस्था गी तबाह करना ऐ, जेडा दफा 370 हटने मगरा सामान्य स्थिति ते समृद्धि आहली पेठा अग्गे बदेआ ऐ। विदेश मंत्री होरें आक्खेआ जे हमले मगरा, सुरक्षा मामलें दी कैबिनेट समिति दी बैठक च पैहला फैसला एह लैता गेआ जे सिंधु जल समझौते गी उसलै तगर स्थगित रखेआ जाग जिसलै तगर

पाकिस्तान आतंकवाद गी समर्थन देना पूरी चाली बंद नेई करी दिन्दा। उने आक्खेआ जे लोकें गी 60 साल तकर दस्सेआ गेआ जे जवाहरलाल नेहरू हुन्दी गलती गी सुधारेआ नेई जाई सकदा, पर प्रधानमंत्री नरेंद्र मोदी हुन्दी अगुवाई आहली सरकार नै दस्सी दिता जे इसी सुधारेआ जी सकदा ऐ। डॉक्टर जयशंकर होरें आक्खेआ जे भारत 1947 सोयां बन्ने पार आहले आतंकवाद दा सामना करा र दा ऐ ते हुन खून ते पानी कन्नो कन्नी नेई बगी सकदे। उने आक्खेआ जे भारत पिच्छले इक दहाके च केई वैश्विक मंचें पर आतंकवाद दे मुद्दे गी वैश्विक एजेंडे च रखने च सक्षम रेआ ऐ। विदेश मंत्री होरें आक्खेआ जे पहलगाम च आतंकी हमले दे पीछे रए दे द रेजिस्टेंस फ्रंट - टीआरएफ गी अमरीका नै आतंकी संगठन घोषित करी दिता ऐ। उने आक्खेआ जे भारत नै सखत सनेहा दिता ऐ जे ओह कुसै बी चाली दी मध्यस्थता आस्तै तैयार नेई ऐ। ते ओह परमाणु ब्लैकमेल गी बी मंजूर नेई करगौ।

<><><><><><>

Loksabha-URLBlocked

सरकारै आक्खेआ ऐ जे ऑपरेशन सिंदूर दौरान झूठी ते संभावित रूप कन्नै हानिकारक जानकारी फैलाने आस्तै डिजिटल मीडिया दे इक हज़ार 400 सोयां मते यूआरएल यानी वेब एड्रेस ब्लॉक करी दिते न। सूचना ते प्रसारण मंत्री अश्विनी वैष्णव होरें अज्ज लोकसभा च एह जानकारी दिती। उने आक्खेआ जे सरकार नै फर्जी ते भ्रामक सूचनाएं दा प्रसार नियंत्रित करने आस्तै सारियां संभव पैहलकदमियां कीतियां न। श्री वैष्णव होरें आक्खेआ जे इया दिक्केआ गा ऐ जे ऑपरेशन सिंदूर दौरान बड़ड़े पैमाने पर फर्जी खबरें,

समीक्षा कीती गई ते एह यकीनी कीता गेआ जे इसदा लाह बद्दोबद्द करसानें तगर पुज्जी सकै। कार्यक्रम दा नेतृत्व प्रधानमंत्री नरेंद्र मोदी उत्तर प्रदेश दे वाराणसी च करडन। बैठक च श्री चौहान होरें अधिकारियें गी राष्ट्रीय, राज्य, जिला ते ग्राम स्तर पर करसानें गी इस कार्यक्रम कन्नै जोड़ने आस्तै निर्देश दिते। उने इस कार्यक्रम गी इक राष्ट्रव्यापी अभियान दे तौर पर आयोजित करने दा आह्वान कीता। श्री चौहान होरें पूरे देश दे करसानें सोयां इस कार्यक्रम च हिस्सा लैने दा बी आग्रह कीता। कृषि मंत्री होरें दस्सेआ जे प्रधानमंत्री मोदी हुन्दी अगुवाई च, इस योजना दे तैहत करसानें गी 3 किस्ते च छह-छह हजार रुपे हस्तांतरित कीते जा र दे न। ते हर इक किस्त हर चार महीने च जारी कीती जन्दी ऐ। पूरे देश दे 731 कृषि विज्ञान केन्द्रें, भारतीय कृषि अनुसंधान परिषद ते कृषि विश्वविद्यालयें दे निदेशक, कुलपति ते प्रमुख इस बैठक च वर्चुअल माध्यम कन्नै शामिल होंडन।

<><><><><><>

Scindia-Sanchar

संचार मंत्री ज्योतिरादित्य सिंधिया होरें आक्खेआ ऐ जे संचार साथी पैहल दी मदद कन्नै इक करोड़ सोयां मते फर्जी मोबाइल कनेक्शन निष्क्रिय कीते गए न। लोकसभा च जिमनी सोआलें दे परते च सिंधिया होरें दस्सेआ जे 35 लकख सोयां मते लोकें इस पोर्टल पर मोबाइल चोरी दी शिकायत दर्ज कराई ऐ। इसचे चा, 21 लकख सोयां मते चोरी होए दे मोबाइल दा पता लाया गया ते 5 लकख सोयां मते मोबाइल फोन संबंधित लोकें गी वापस पताए गए न। सिंधिया होरें आक्खेआ जे दूरसंचार संसाधनें दे दुरुपयोग

कन्नै जुड़ी दी जानकारी साझा करने आस्तै डिजिटल इंटेलीजेंस प्लेटफॉर्म शुरू कीता गया ऐ। इसदा मसकद साइबर अपराध ते माली धोखाधड़ी पर नकेल कसना ऐ। उने आक्खेआ जे मौजूदा समें च बैंक ते माली संस्थानें, केन्द्रशाससित प्रदेशें ते राज्यें दी पुलिस, सुरक्षा एजेंसियें, ते दूरसंचार सेवा प्रदाताएं सन 620 संगठन इस प्लेटफॉर्म कन्ने जुड़े दे न।

<><><><><><>

ISRO-NISAR

भारती अंतरिक्ष अनुसंधान संगठन-इसरो नै अज्ज सिंथेटिक अपरचर रडार उपग्रह निसार दा सफल परक्षेपण कीता। एह इसरो ते अमरीकी अंतरिक्ष एजेंसी नासा दा सांझा मिशन ऐ। एहदे च नासा दा एल-बैंड ते इसरो दा एस-बैंड रडार लग्गे दा ऐ। आंध्र प्रदेश च श्री हरिकोटा दे सतीश धवन अंतरिक्ष केंद्र थमां जीएसएलवी-एफ-16 राकेट दी मदाद कन्ने इसी अज्ज संझा 5 बज्जियै 40एं मिनटें पर इस्सी गासै च छोड़ेआ गेआ। इस मिशन दा मकसद हर 12एं दिनें पर पूरी धरती ते एहदी अंदरूनी हलचल पर बरीकी कन्ने निगरानी रक्खना ते निरीक्षण करना ऐ। एहदे'नै जलवायु परिवर्तन, शोध ते आपदा कार्रवाई लेई बधिया मय्यार दि'आं भलेआं साफ-स्पष्ट फोटू ते आंकड़े उपलब्ध होई सकडन। निसार अपनी भलेयां नमीं तकनीक ते प्रणाली राएं धरती दी सतह ते धरती दे हेठ दी मैपिंग करोग ते उत्थे होने आहिलएं गतिविधिएं ते प्रक्रियाएं दे बारै च वैज्ञानिक जानकारी उपलब्ध करोआग। एहदे अलावा निसार दी मदाद कन्ने धरती ते धरती पर

मजूद बर्फू दे बड्डे-बड्डे प्हाड़ें जिनें'गी ग्लेशियर आखेआ जंदा ऐ, उंदे च होआ'रदे बदलाव दा बी निरीक्षण होग।

<><><><><><><>

PM-Buddha relics

प्रधानमंत्री नरेन्द्र मोदी होंरें अज्ज 127 वरे दे लम्मे इंतजार मगरा भगवान गौतम बुद्ध हुन्दे पवित्र पिपरहवा अवशेषें दी भारत वापसी दा सोआगत कीता। इस मौके पर प्रधानमंत्री होंरें विकास भी, विरासत भी दी भावना जाहिर करदे होई भगवान बुद्ध हुन्दी सिक्खेआए प्रति भारत दी गहरी श्रद्धा ते अपनी आध्यात्मिक ते ऐतिहासिक विरासत दे संरक्षण आस्तै राष्ट्र दी अटूट प्रतिबद्धता गी रेखांकित कीता। इसी देशें दी समृद्ध सांस्कृतिक विरासत आस्तै गौरव ते खुशी दा पल दस्सदे होई प्रधानमंत्री मोदी होंरें आक्खेआ जे पिपरहवा अवशेषें दी खोज 1898 च होई ही, पर औपनिवेशिक काल दौरान इनें गी भारत सोयां लैता गेआ। उने आक्खेआ जे जिसलै इस बरे दी शुरुआत च इक अंतरराष्ट्रीय नीलामी च एह अवशेष सामने आए, तां सरकार नै उनदी वापसी यकीनी करने आस्तै फौरी तौर पर कार्रवाई कीती। उने इस महत्वपूर्ण जतन च योगदान देने आहले सारे लोकें दी बी सराहना कीती।

<><><><><><><>

Padam-Puruskar

पद्म पुरस्कारें आस्तै नामांकन ते अनुशंसाएं दी खीरी तरीक 15 अगस्त तक बदाई दिती गई ऐ। पुरस्कारें आस्तै नामांकन छडा राष्ट्रीय पुरस्कार पोर्टल पर ऑनलाइन लैते

जाडन। वरे 2026 च गणतंत्र दिवस दे मौके पर घोषित कीते जाने आहले पद्म पुरस्कार-2026 आस्तै नामांकन इस बरे 15 मार्च सोयां शुरू होई गए हे। पद्म पुरस्कार देशे दे सर्वोच्च नागरिक पुरस्कारें चा इक न। इसदे च पद्म विभूषण, पद्म भूषण ते पद्म श्री सम्मान बक्ख बक्ख क्षेत्रें ते विषयें च खास, टकोदी ते असाधारण उपलब्धियें ते सेवा आस्तै दिते जन्दे न।

<><><><><><>

President-WB

राष्ट्रपति द्रौपदी मुर्मु होर अज्ज पश्चिम बंगाल दे नादिया जिले च स्थित अखिल भारतीय आयुर्विज्ञान संस्थान -एम्स, कल्याणी दे दीक्षांत समारोह च शामिल होईयां। इस मौके पर बोलदे होई राष्ट्रपति हें पास होए दे विद्यार्थिं गी आक्खेआ जे ओह दवोए लतडोए दे ते गरीब लोकें गी सेहत सरबधी सेवा उपलब्ध करोआन ते इस इदारे दा मान बदान। आयुष ते सेहत ते परोआर कल्याण राज्य मंत्री प्रतापराव जाधव बी इस मौके पर उत्थे मौजूद हे। उने आक्खेआ जे प्रधानमंत्री नरेंद्र मोदी हुन्दे मार्गदर्शन च सरकार, देश च विश्व स्तरीय चिकित्सा सुविधां आस्तै कमकरा र दी ऐ. इसदा मसकद पूरे भारत च किफायती चिकित्सा सेवाएँ प्रदान करना ऐ।

<><><><><><>

Amarnath-Yatra Suspended

मौसम दे खराब सूरतेहाल दे मददेनजर कल 31 जुलाई गी जम्मू दे भगवती नगर आधार शिविर थमां कुसै बी जत्थे गी कश्मीर घाटी लेई रवाना नेई कीता जाहग। जम्मू

दे डिवीजनल कमिशनर रमेश कुमार होंरें दस्सेआ ऐ जे एह फ़ैसला श्रद्धालुएं दी सुरक्षा दे मददेनज़र एहतियाती हीले दे तौर पर लैता गेआ ऐ। श्री अमरनाथ जी दी जातरा गी अज्ज बड़लै भारी बरखा दे मददेनज़र पहलगाम ते बालटाल आहले दौनें रस्तेया रोकी दिता गेआ ऐ। कश्मीर दे डिवीजनल कमिशनर विजय कुमार बिधुरी होंरें आखेआ जे खराब मौसम करी श्रद्धालुएं गी अज्ज पहलगाम ते बालटाल आहले रस्तेया अग्गे जाने दी इजाजत नेई दिती गई। तोआई इस बरे दी श्री अमरनाथ जी दी जातरा दरान अजें तोहड़ी बाबा बर्फानी दे दरबार च मत्था टेकने आहलें दी गिनतरी 3 लक्ख 93 जहार दे आंकड़े गी पार करी गई ऐ। तोआई

<><><><><><>

Poonch-Encounter

सुरक्षाबलें पुंछ सैक्टर च कब्ज़ा रेखा दे नेड़े द'उं आतंकवादिएं गी मारी-मुकांदे होई बन्ने पारा थमां घुसपैठ दी कोशश गी नाकाम बनाई दिता ऐ। सोशल मीडिया दी इक पोस्ट च फौज दी व्हाइट नाईट कोर नै जानकारी दिती ऐ जे सुरक्षाबलें दी फौरी ते सटीक कार्रवाई नै दुश्मन दे भैंड़े मन्सूबे गी नाकाम बनाया ऐ। एहदे शा पैहले कब्ज़ा रेखा दे नेड़े संदिग्ध नक्लोहरकत दिक्खने परैन्त सोहगे जवानें घुसपैठिएं गी ललकारेया जेहदे पर दपक्खी गोलीबारी होई ते द'उं आतंकवादी मारे गे। इस अभियान दी कामयाबी च सुरक्षाबलें ते जम्मू-कश्मीर पुलस दे तालमेल ते खूफिया जानकारियें बड़ी महत्वै आहली भूमिका निभाई ऐ।

<><><><><><>

Nagrota-Terror Ass

आतंकवाद दे खलाफ इक बड्डी कामयाबी हासल करदे होई जम्मू पुलसै नगरोटा दे टीसीपी नाके थमां आतंकवादिएं दे इक सैहयोग गी हिरासत च लैता ऐ जेहड़ा कश्मीर बक्खी जाने दी कोशत करै करदा हा। सोशल मीडिया दी इक पोस्ट च जिला पुलस जम्मू नै जानकारी दिती ऐ जे आरोपी दी पन्छान अज़ान हमीद गाज़ी दे तौर पर कीती गई ऐ ते ओहदे कब्जे शा त्रै पस्तौलां, मैगज़ीनां ते कारतूस बरामद कीते गे न। जिस गड्डी च ओह सफर करा'रदा हा उसी कब्जे च लेई लैता गेआ ऐ ते इस सरबंधै च नगरोटा पुलस थाने च मामला दर्ज करियै अगड़ी तफ्तीश शुरू करी दिती गई ऐ।

<><><><><><>

Drone-Kathua

जम्मू-कश्मीर पुलसै कठुआ जिले दे हीरानगर इलाके च ड्रोन राएं उत्थे सुट्टे गेदे 400 ग्राम दा नशीले पदार्थे दा इक पैकेट बरामद कीता ऐ। मकामी लोकें आसेआ दिती गेदी जानकारी पर कार्रवाई करदे होई मकामी पुलस ते बीएसएफ नै इलाके च कार्रवाई शुरू कीती ते इस पैकेट गी बरामद कीता जेदे च एह नशीले पदार्थ छपैलिए रक्खे दे हे। सुरक्षा बलें आले-दोआले दे पूरे इलाके गी बी खंगालेआ तां जे बन्ने पारा किश होर समेयान ते नेही पुजाया गेदा। इस मामले च इक एफ.आई.आर दर्ज करियै अग्गे दी जांच शुरू करी दिती गेदी ऐ। एस.एस.पी कठुआ शोभित सक्सेना होरें आखेआ ऐ जे पूरे इलाके च सर्तकता बनाई रक्खी गेदी ऐ ते तुपाई अभियान जारी ऐ।

